

## 2 KORÍTO

### Paoro Iokanatsopatakiti Iuaĩkana

### Korĩto Auakanimoni

<sup>1</sup> Nota Paoro, Xesosi Kristo iokanatakitino. Teoso nirekari iokanatinino kãkitimoni isãkire nisãpiretini ĩkapani. Ia aãtsopa niõkatsopata. Aĩtari Tximótxio aua notakata. Ia iõkatsopari niokanata kãkiti Teoso mereẽkinimoni, Korĩto sitatxiti auakanimoni. Apaka ia iõkatsopari niokanata kãkiti Teoso nakitiakorimoni, Akaia tixini auakanimoni. <sup>2</sup> Aĩri Teoso, Xesosi Kristo Apiananiri pakini sikari ikinipoko erekari hĩtemoni. Ika-maerekaxiniretai hĩte.

#### *Teoso Mĩkapiritiniua Pirena*

<sup>3</sup> Peerekari Teoso. Aãũite Xesosi Kristo iri itx-  
aua. Kaamonĩkareri iua. Āti kãkiti amonĩkakari  
iua atoko inakari !auari. Amaerekaxinirensaaki, iua  
atekata aua. Amaerekaxinireni imaktxakinaua. Iuasaaki  
imĩkapiritaua. <sup>4</sup> Imĩkapiritaua amaerekaxinirensaaki,  
ininiã apanakini maerekaxinirensaaki, iua atokotxikana  
ate mĩkapiritana ninoa apaka, kotxi aimarotari Teoso  
mĩkapiritiniua ate. <sup>5</sup> Kristo iteene misiritaãka, ininiã  
ate misiritaãka apaka. Iua atokokana Teoso moianatari  
Kristo, ininiã iua moianataua ate apaka. <sup>6</sup> Apanakini  
misiritaua, kotxi anirekari Teoso mĩkapiritinii hĩte.  
Anirekari Teoso makatxakiniri himaerekani. Teoso  
mĩkapiritaua ate, ininiã hĩte apaka imĩkapirita. Teoso  
mĩkapiritakasaakii hĩte, isikataparatai himisiritiko hĩpox-  
okoniritika himĩteenekini ĩkapani. Hĩte misiritiko ate  
misiritiko atokokana. <sup>7</sup> Aimarotapitikari erekari Teoso  
sikinii hĩte, kotxi himisiritaãka ate misiritiko atokokana,  
ininiã Teoso mĩkapiritai hĩte, ate imĩkapiritini atokokana.

<sup>8</sup> Aĩtariakori, anirekari hĩxinikiniri ate misiritiko Ásia tixini aũuakasaaki. Iuasaaki iteene amaxikaãka. Kona amĩteenekari. Auãkatari aõkiko. <sup>9</sup> Iuasaaki aãkixinireẽ atxa: “Apinapitikako,” atxa. Ikara atoko ininiã, aimarotari kona ate posotiire !auari. Aimarotari Teosonoka sikataparataua, kotxi iua posotari õkitikiniri ipĩkari. <sup>10</sup> Pamonõkoniri iuasaaki, iuaritika Teoso makatxakaua amapinakani ĩkapani. Iua makatxakapanikaua amapinakani ĩkapani. Ate auikari iua sãkire, iuaĩkana imakatxakiniua tĩkane. <sup>11</sup> Hĩte moianataua ate, kotxi himisãkiretari Teoso ate ĩkapani. Ininiã Teoso kamari hamanaãkiti iaõka, kotxi Teoso kamari erekari atemoni. Eereka kaiõpokori kãkiti sãpiretari Teoso iua ereka inini, kotxi ikamari ninoa amanaãkiti iaõka ate ĩkapani.

*Paoro Masikani Korĩtomoni*

<sup>12</sup> Ate poxokoniuaata, kotxi ate kamari erekarinoka Teoso oerekakitinoka, kãkitimoni, hĩtemoni apaka. Atãonoka anireka akamini kãkitimoni. Aimarotari ikara aãkixinireẽ, ininiã apoxokoniuaata. Ikara atoko aũuini, kotxi ikinipoko erekari Teoso sikakiti sikataparataua. Kãkiti imaroreẽ ! iposotari ikaminiri iua auini ereka inini, kotxi !kiĩkiteri kãkiti. <sup>13</sup> Hãtatsopatakasaakiri aiõkatsopatakiti hĩtemoni, himarotari axinikakiti aãkixinireẽ. Axinikakiti, asãkire pakini atinoka itxaua. <sup>14</sup> Hĩte na iteene imarotapanikaua ate, iuaritika ninirekari hĩuikiniua ate, Apiananiri Xesosi uai ikanapiriini õtisaaki, ate iuikinii atokotxikana.

<sup>15</sup> Ikara nimarota, ininiã ninirekamari hĩtemoni nisini, ipikata hĩpoxokoniuatini ĩkapani. <sup>16</sup> Masetónia tixinimoni nisini apisapanika, ninirekamari hĩtemoni nisini. Eereka nikanapiriãkasaaki uaimoni, ninirekamari hĩtemoni iuaĩkana nisini, ininiã iuasaaki ninirekamari hĩte iokanatinino nota Xotéia tõpamoni. Txamari na nisa. <sup>17</sup> Atxiĩti hĩte txano nota: “Pixinikasaakiri uai papokini,

na iteene pinirekari uai papokini,” hĩtxano. Txamari ninirekapitikari napokini hĩtemoni. Na nota xinikari Teoso sãkire mauĩãkani xinikakiti atoko, kotxi ninoã sãkire: “Ari, nisapitika,” txamari ãkixinireẽ itxana: “Na nisapani,” itxana. <sup>18</sup> Nota sãkire hĩtemoni ninamaã: “Ari nisapitika,” ninakasaaki, nãkixinireẽ apaka txari: “Ari, nisapitika,” nitxa. Teoso atãonoka sãkirauatakari imarotari ikara nisãkire atão inini. <sup>19</sup> Síyasi inakori, Tximótxio inakori, nota pakini sãpiretapekai hĩte Teoso ãkiri, Xesosi Kristo sãkire. Xesosi sãkire inamaã auakari, isãkire ãkixinireẽ auakaritxikana isãkireta. “Nikamapitkariko,” inakasaaki, ãkixinireẽ inirekapitikari ikaminiri. Ikamari isãkire iaõka. <sup>20</sup> Teoso sikaenetakiti kãkitimoni kaiãopokori aua. Iua Kristo sikaua ikinipoko Teoso sikaenetakiti, ininiãkara atxari: “Ameẽ.” Peerekari Teoso, kotxi Kristo sikapitika Teoso sikaenetakiti. <sup>21</sup> Teosokara sikataparaxiniretai hĩte, ate apaka, Xesosi Kristo am- atakanapakani ãkapani. Teosokara mereẽua iua naki- tiakori aniniua ãkapani. <sup>22</sup> Apaka Teosokara sikaua Erekarĩ Matamatakoti, Teoso nakiti aniniua aimarotini ãkapani. Iua Erekarĩ Matamatakoti aua aãkixinireẽ. Teoso takaõtxikare itxaua iua. Iua Erekarĩ Matamatakoti merepitipanika Teoso sikakiti atemoni, ininiã aimarotari apikomoni isikapanikaua itanapoko inĩkatakiti ate ãka- pani.

<sup>23</sup> Kona nisari hĩte Korĩto sitatxiti auakanimoni, kotxi kona ninirekari hĩte matinaniuatini hĩte maerekani nisãpiretini xika. Teoso imarotari ikara atão inini. <sup>24</sup> Hĩauĩte kona ate txaua. Kona apaniãtai: “Ia atoko inakari hãuika. Kona ikara atoko inakari kona hãuikape.” Kona ikara atoko !atxai hĩte, kotxi hĩte auikapitikari Teoso sãkire atão inakari. Aparĩkauata hĩtekata hĩpoxokoniua- tini ãkapani.

## 2

<sup>1</sup> Nākixinireẽ nitxari: “Na nisa iuaĩkana ninoamoni nikamamatinanitinina ĩkapani.” <sup>2</sup> Nota xika maerekaxinireninoka hininiã, kiripa kamapoxokinitano nota? Hĩtenoka aua nota kamapoxokonitakani. Ininiã kona nota nirekari maerekaxinireni hinini nota xika. <sup>3</sup> Kona ninirekari hĩtemoni napokini, maerekaxiniretikano ninini, hĩte maerekani xika, ininiãkara nota iokanatsopatari ĩkora mitxi niøkatsopatakiti hĩtemoni ereẽ napokini apisapanika. Kotxi nikamapoxokonitakini hĩtxaua hĩte. Nimarotari ia. Nota nienenĩkasaaki, hĩte himakinika enenĩka apaka. <sup>4</sup> Niokanatsopatari ĩkora niøkatsopatakiti hĩtemoni, kotxi himaerekani xika maerekaxiniretinoka nitxa. Nitxiapata. Niokanatsopatari ĩkora niøkatsopatakiti hĩtemoni, iteene nitiretinii himarotini ĩkapani. Na ninirekari nikamamatinanitinii.

### *Maerekanitxi Maxinĩkaretiko*

<sup>5</sup> Iua kiki maerekati kamakari maerekaxinireti txĩkitakano. Iua apia maerekaxinireti txĩkitakai hĩte, maerekati ikamini xika. Na iteene ninirekari nitxitiniri iua. <sup>6</sup> Uatxa atokopeka homanatiniri. Iua txitaãkapeka imaerekani xika. <sup>7</sup> Uatxa himaxinĩkaretariko maerekati ikamakiti, ininiã hãpakapariko iua. Himisãkiretariko iua. Hĩkamapoxokonitari iua. Ikara atoko himinakaniãri, iua kona erekaxinireri. Ikara atoko himinakaniãri, atxiĩti itakanapari Teoso kimapore. <sup>8</sup> Ininiãkara nota õtãkikai hĩte nitapararitika. “Atiretapitikai,” hĩtxariko iua, hĩtiretiniri imarotini ĩkapani. <sup>9</sup> Ininiã mitxi niokanatsopata hĩtemoni, kotxi iusaaki nataerekatai hĩte. Ninirekari nimarotiniri, hĩkĩpitatari nõtãkikinii atxiĩti? <sup>10</sup> Himaxinĩkaretakasaakiri maerekati ãti kamakiti, nota apaka maxinĩkaretari. Maerekati ãti ereẽ kamakiti auiniã, nimaxinĩkaretari, kotxi nitiretai hĩte. Kristo nirekari nimaxinĩkaretiniri maerekati ikamakiti.

<sup>11</sup> Axinikasaakiri maerekati āti kamakiti, akamari Satanasi nireēkiti. Ininiākara lakamari Satanasi nireēkiti. Paimatireri iua. Inirekari akerokiniri. Aimarotari iua nireēkiti, ininiā apia imatirerini matxaua.

*Txito Paoro Nitini*

<sup>12</sup> Tóatxi sitatxiti napokasaaki Kristo iokanapirena erekari nisāpiretini tīkane, kākiti iuaā auakani nirekari nisākire imarotinina, kotxi Apiananiri sikanireōtana nisākire imarotinina īkapani. <sup>13</sup> Iuaritika !erekaxinireno, kotxi ninitapiimari aītari Txito inakori. Kona napokari. Ininiā nitakapiretanapana kākiti iuaā auakani: “Ereēpiko. Masetónia tixinimoni nisako,” nitxana.

*Kamariāro Atoko Atxa*

<sup>14</sup> Peerekari Teoso kamakiti ate īkapani. Kristo nakiti aniniāua, Teoso txīkitakaua ātipirika akāiatini, ikinimane imarotini īkapani. Teosokata akāiata. Teoso paniā-taua Kristo pirena imarotiko ikini tōpati iaripiretini, kamariāro iarikatxiātini atokokana Kristo pirena iaripiretini īkapani. <sup>15</sup> Kristo sikaua Teosomoni, ininiā Teoso apokaerekataua, kotxi kamariāro arikiko Teoso īkapani atokokana atxa. Kamariāro arikasaaki omari samariāpota ikini tōpati. Iua atokokana asaāpota kākitimoni, kākiti apokakonimoni, kākiti pīpinanaākanimoni apaka. <sup>16</sup> Kākiti pīpinanaākanimoni kanaiatxiāri atoko atxa, kotxi asāpiretana Kristo sākire imauikakaniāna, ipinana. Kākiti Teoso apokakinimoni kamariāro eretxiāro atoko atxa, kotxi asāpiretana Kristo sākire auikiniāna, auap-ininiika itxanako Teosokata. Kiripa posotari ikara atoko inakari parīkatxi ikamini Teoso īkapani? <sup>17</sup> Ate posotari Teoso īkapani aparīkauatini, kotxi kona apanakini atokoni !atxa ate. Kaiāopokori kākiti sāpiretari Teoso sākire txineiro apakapini īkapani. Ninoamoni Teoso sākire tiitxi vētxitiko atoko itxa. Kona ikara atokoni !akama, kotxi

Teoso iokanataua ate kākitimoni. Teoso atamataua, ininiā atāonoka asākirauata, kotxi Kristo nitiriakori atxaua.

### 3

#### *Iōkatsopari Atoko Hītxa*

<sup>1</sup> Atxiīti iuaīkana ate sāpiretatari erekari akamakiti asākire hāuikini īkapani? Atxiīti hinirekatari apanakini iōkatsopatiniri erekari ate kamakiti ate sākire hāuikini īkapani? Atxiīti ate nirekatari apanakini iōkatsopatiniri erekari hīte kamakiti hīte sākire ate auikini īkapani? Apanakini kamari ikara atoko. Ate kona kamari ikara atoko. <sup>2</sup> Kona ninirekari iōkatsopari ikara atoko inakari, kotxi iua iōkatsopari atoko hītxa hīte. Ate ākixinireē iōkatsopari atoko hītxa. Ikinimane atatsopatari ikara iōkatsopari, ininiā imarotarina erekari hīte kamakiti. <sup>3</sup> Iōkatsopari Kristo iōkatsopatakiti ate mīkiti atoko hītxa. Kona txītaā iōkatsopataāka. Erekari Matamatakoti Teoso Mapinakati iōkatsopatari. Kona aātsopaā iōkatsopataāka. Kākiti ākixinireē iōkatsopataāka.

<sup>4</sup> Ikara atoko atxai hīte, kotxi iteene aimarotari Teoso, Kristo nakitiakori aniniua. <sup>5</sup> ! Kimaroreua ate. Ateka ! aposotari aparīkauatini Teoso īkapani. Teosora sikaposotiiretau. Isikari imarore atemoni. <sup>6</sup> Isikaposotiiretau Teoso īkapani aparīkauatini īkapani, isākire amaneri kākiti asāpiretini īkapani. Ikara isākire amaneri oerekaua Erekari Matamatakoti aākixinireē auini. Isākire amaneri !oerekaua ipaniātakiti iōkatsopatakori Moisesimoni isikakiti. Ipaniātakiti iōkatsopatakori Moisesimoni isikakiti paniātari kākiti ipinini imaerekani xika. Erekari Matamatakoti aākixinireē auiniā, itxīkitakaua aāuapininiika anini.

#### *Teoso Parīka Amaneri*

<sup>7</sup> Teoso paniâtakiti tesi pakini iôkataãka kai nopini. Teoso sikasaakiri ikara Moisesimoni, Teoso iotximere iteene aua. Moisesi toõ iuasaaki apakapari Teoso iotximere. Iteene iotximere aua Moisesi toõ, ininiã kãk-iti Isaeo auakani kona posotari atamatiniri. Iotximere poiãoãpotakasaaki, liposotapanikarina itoõ atamatinina. Ininiã Teoso iotximere auakasaaki, isãkire iôkatakori apoka itiximoni kãkiti ipinini îkapani. <sup>8</sup> Uatxa iua Erekarî Matamatakoti txikitakari kãkiti âtipirika auini îkapani, ininiã uatxa Teoso parîka apiata. Peerekari ikara iparîka. <sup>9</sup> Peerekari Teoso parîka ipaniâtakiti iôkatakori kãkitimoni isikasaaki, txamari iuasaaki oerekari kãkiti misiritiko imaerekani xika. Uatxa Teoso parîka api-aerekata, kotxi Kristo kamaerekatari kãkiti. <sup>10</sup> Uatxa Teoso parîka apiata. Peerekari. Iotximere apiari atoko itxa, ininiã iua parîka kitxakapirîka iotximere napakari atoko itxa. <sup>11</sup> Kitxakapirîka Teoso parîka ipaniâtak-iti iôkatakori isikasaaki peerekari, txamari ikara Teoso parîka xipope. Îkorasaaki iparîka kãkiti ikamaerekatini ! ixipoka, ininiã apiaerekata.

<sup>12</sup> Ia Teoso parîka !ixipoka, ininiã ataparaxinireritika asãkirauata. <sup>13</sup> Moisesi atoko ! atxaua, kotxi iua ipatoõtaua mãkatxi mataã, itoõ iotximere Isaeo auakani matamatakani îkapani. Itoõ iotximere poiãota, iuaritika ! iposotarina atamatinirina. <sup>14</sup> Moisesi ipatoõtiniua atokokana ninoa Isaeo auakani oki ipataãka, kotxi ! imarotarina atão Teoso nireëkiti. Uatxapiima okina ipataãkapanika atatsopatakasaakirina Teoso sãkire iôkatsopatakori, Xesosi apokini apisapanika auakari sãkiretxiti. !Imarotarina Teoso nireëkiti. Kristo sãkire auikikosaaki, iua ipatoõtiko makatxakaãka, ininiã iuasaaki kãkiti imarotari Teoso nireëkiti. <sup>15</sup> Îkorasaaki apaka Moisesi iôkatsopare atatsopatakasaakina, ! imarotarina. Okina ipataãkapanika. <sup>16</sup> Kãkiti

akiritakasaakiri Apiananiri, ipatoõtiko makatxakaãka. <sup>17</sup> Erekari Matamatakoti itxaua Apiananiri. Erekari Matamatakoti auiniã aãkixinireẽ, ! aparĩkauataika amaerekani makatxakiko ikapani, kotxi Xesosi makatxakapekari amaerekani. <sup>18</sup> Xesosi sãkire auiãkani atxaua, ininiã atoõ kona ipataãka. ãtakaãri atoko atxaua. Kãkiti atamatakasaakiua ate, atamatarari Apiananiri iotximere. Apiananiri Erekari Matamatakoti aãkixinireẽ txĩkitakaãpotaua ikara atoko aniniua, ininiã apiaãpota aiotximere.

## 4

### *Teoso Iokanapirena Erekari Pokamara Atoko Itxa*

<sup>1</sup> Teoso amonĩkaua ate, ininiã iua paniãtaua ia parĩkatxi akamini, iokanapirena erekari apanakinimoni asãpiretini. Ikara atoko ininiã, isikataparaxiniretaua, ininiã ! anirekari atakanapiniri ikara parĩkatxi. <sup>2</sup> Kãkiti kipatarari ikamakiti, maerekati ikamakasaaki, kotxi ipẽtauata. Ikara atoko inakari maerekati !akamaika. Atakanapapekari. ! Amisirienetari kãkiti. Kona akoketari ate sãkire Teoso sãkirekata. Teoso kenakotari asãkire, ininiã atãonoka asãkire, ininiã kãkiti ãkixinireẽ imarotari akamakiti atão inini. <sup>3</sup> Kãkiti mimarotakanisaakiri Teoso iokanapirena erekari asãpiretakiti, kãkiti pĩpinanaãkari atoko itxa. <sup>4</sup> Kãkiti pĩpinanaãkari ! imarotari Teoso iokanapirena, kotxi kãkiti teosone, Satanasi inakori, ipatarari ninoa oki, ininiã !atamatarina pokamara ninoa iopiniãkari. Teoso iokanapirena erekari pokamara atoko itxa. Peerekari ikara Teoso iokanapirena. Iua erekari pirena sãpiretari Kristo Apiananiri ininiua, kotxi Teoso itxaua. <sup>5</sup> Ate kona sãpiretari kãkiti ateka pirena. Ate sãpiretari Xesosi Kristo Apiananiri ininiua. Ate hĩte nitiriakori atxaua, kotxi Xesosi nirekari hinitiriakori aniniua. <sup>6</sup> Kitxakapirĩka ipiãnoka auakasaaki, Teoso txari: “Piopinikaxitita.”



Iuasaakipeka iopinikaxitita. Iua Teosotxikana iopinikari aãkixinire. Ikara iopinikare kamaimarorettau Teoso Api-ananiri kaiotximereri ininiua. Kristo aãtamatakasaaki, aãtamataru Teoso iotximere.

*Xesosi Sãkire Auiãkani Misiritiko*

<sup>7</sup> Kopiti maikoti atoko atxaua, kotxi atapara !auari. Iuaritika atemoni auari Teoso iokanapirena erekari katireri. Ininiã aimarotari Teosonoka kaposotiireri, kataparari ininiua. Atepekana laposotari. Atapara !auari. <sup>8</sup> Asinimoni amaxikakini aua, iuaritika !okaua ate. Atxiĩti !aimarotari akamakiti tĩkane, iuaritika kona aiotokakari Kristo sãkire aãuikini. <sup>9</sup> Amisiritiko aua, iuaritika Teoso kona takanapaua ate. Atxiĩti akarotaãka, iuaritika kona aõkaãka. <sup>10</sup> Ikiniõtika aĩto okiko monõkoni aua Xesosi sãkire aãuikini xika. Xesosi atatsiirauata. Ipina. Iua atokotxikana ate atatsiirauata. Atxiĩti aĩto ipina iua sãkire aãuikini xika. Xesosi auapika, kotxi ipĩpe, eereka õkitikaua, ininiã iua atokokana aĩto auapika. <sup>11</sup> Auapanika anakasaaki, aõkiko monõkoni aua Xesosi sãkire aãuikini xika. Aĩto ipinapitikako, iuaritika aãuapanika, kotxi Xesosi auapanika. <sup>12</sup> Xesosi iokanapirena asãpiretini xika, apanakini nirekari okiniua ate. Xesosi iokanapirena asãpiretakasaakii, hĩte aukari, ininiã hĩte auapika himaxipokakani.

<sup>13</sup> Teoso sãkire iõkatsopatakori txari:

Nota aukari Teoso sãkire, ininiã nisãpiretari kãkiti. Iua atokotxikana ate aukari Teoso sãkire, ininiã ate sãpiretari kãkiti. <sup>14</sup> Teoso õkitikari Apiananiri Xesosi, iuaĩkana auini ĩkapani, ininiã aimarotari Teoso õkitikiniua ate apaka, iuaĩkana aãuini ĩkapani. Eereka Teoso anikauako ate hĩtekata Xesosi aaõkitini Teoso apisatoõ. <sup>15</sup> Amĩteenekari ikinipoko amisiritiko Xesosi sãkire hĩte-moni asãpiretini ĩkapani. Kãkiti apikomoni, apikomoni, apikomoni, txaãpota apakapari ikinipoko erekari Teoso

sikakiti, ininiã ninoa kãkiti kaiãopokori txari Teoso: “Erekapitikari pisikakiti notamoni.” Ikara atoko ininiã, kãkitipokoni txari: “Peerekari Teoso,” itxako.

*Maerekaxinireni !Atxaua*

<sup>16</sup> Ininiãkara maerekaxinireni ! atxaua. Aĩto xipokaãpota, iuaritika aãkixinire ikiniõtika apiataparaãpota. <sup>17</sup> Īkorasaaki amaxikiko auapitika Xesosi sãkire aãuikini xika. Kona okanani aua amaxikiko. Eereka Teosokata ãtipirika aãuapika, kotxi aãuikari isãkire. Peerekari iusaakiko. !Axinikaikari mitxi amaxikiko, kotxi iusaakiko peerekari. <sup>18</sup> Kona amaãkatari aãtamatakiti. Amatamatakiniti axinika. Atamatakori xipokako. Matamatakoti kona xipoka.

## 5

*Aãuapoko Teoso Tixineẽ*

<sup>1</sup> Īkorapokoriti aãuakasaaki, aĩto aãuapoko itxaua aãkixinire ĩkapani. Āti õti aĩto xipoka. Ixipokasaaki, Teoso sikari ãtião aãuapoko. Iua aĩto isikaua, itixine aãpokasaaki. Iua aĩto kona xipokaika. Iua aãuapoko kona uakõtxiã kamakorini. <sup>2</sup> Īkorasaaki aãtatsiirauatakasaaki, atxari: “Ninirekari ãtião niĩto, niĩto Teoso sikakiti itixine napokasaaki.” <sup>3</sup> Anirekari ãtião aĩto, ininiã maĩtotika !atxaua. <sup>4</sup> Īkorasaaki ia aĩto auapanika inakasaaki, aãtatsiitari katsiiri. Kona kataparari ia aĩto. Anirekapitikamari aĩto. Anirekari ãtião aĩto, ininiã aĩto maxipoãkati makatxakari aĩto xipoãkari. <sup>5</sup> Teoso kamari aĩto maxipoãkani ĩkapani. Isikapankauako aĩto ikara atoko inakari. Aimarotari ikara atão inini, kotxi isikapekari Erekar Matamatakoti atemoni. Ipixini Teoso sikaenetakiti isikapekaua, ininiã apikomoni isikaenetakiti isikapitikauako.

<sup>6</sup> Ininiã kataparaxinirepitikaua ate. Aimarotari aãuapoko ia aĩto ininiãua, kona aãpokapanika Apiananiri

tixinemoni. <sup>7</sup> Xesosi sãkire auikiko oerekaua atão aãuini tĩkane. Aõkinoka kona oerekaua atão aãuini tĩkane. <sup>8</sup> Kataparaxinirepitikaua ate. Kona ate pĩkari apinini. Apiaerekata apinini, kotxi iuasaakiko Apiananirikata aãua. <sup>9</sup> Anirekari amiinitiniri Apiananiri, ia aĩto ãki aãuakasaaki, ia aĩto xipokasaaki apaka. <sup>10</sup> Æti õti ate amakinika sariko Kristomoni. Iuasaaki Kristo sãpiretaua aparĩka ĩki. Iua imarotari ikinipoko akamakiti ia aĩto ãki aãuakasaaki. Atxiĩti akamari erekari. Atxiĩti akamari maerekati. Akamakiti iaõka isikaua aparĩka ĩki.

### *Kãkiti Mikanapiriĩko Teosomoni*

<sup>11</sup> Aimarotari Apiananiri katapara inini, kotxi imisir-itari kãkiti imaerekani xika. Ininiã asãpiretari kãkiti auikiniri iua sãkire. Aparĩkauata, iua sãkire kãkiti auikini ĩkapani. Teoso iteene imarotaua. Imarotari axinikakiti aãkixinireẽ. Ninirekari hĩte apaka iteene imarotiniua ate hãkixinireẽ. <sup>12</sup> Kona ate nirekari iuaĩkana asãpiretinii hĩte ereka anini. Anirekari asãpiretinii, apakatapitika hĩuikiniua ate, kotxi atãonoka akama. Ikara atoko inakari himarotiniã, himarotari kãkiti hãpakapapiretini, ninoa misãkirepiretakasaakiua ate. Ninoa kãkiti ate misãkirepiretakani iuikari atamatakorinoka. Kona imaãkatari kãkiti ãkixinire ereka inini. <sup>13</sup> Atxiĩti kãkitimoni kona kiĩkiteua ate. Ikara atoko atxa Teoso ĩkapani. Atxiĩti paĩkiteua ate. Ikara atoko atxa hĩte ĩkapani. <sup>14</sup> Kristo iteene tiretaua, ininiãkara anirekari iua nireẽkiti akamini, kotxi aimarotari iua ipina ikinimane ĩkapani, kotxi ikinimane ipĩkani atoko itxauana. <sup>15</sup> Kristo ipina ikinimane kãkiti ĩkapani, kãkiti mapinakani ĩkapani, kãkiti ãtipirika auini ĩkapani. Ininiã iua kãkiti kona kamaikariko iuaka nireẽkiti ikiniõtika. Ikamariko Kristo nireẽkitinoka, kotxi Kristo ipina iua ĩkapani. Iuaĩkana õkitikapekaua.

<sup>16</sup> Ininiā uatxa ! axinikaikari kākiti ĩkorapokoriti auakani xinikakiti atokokana. Mitxi axinikari Kristo ninoa xinikiniri atoko. Uatxa !axinikaikari Kristo ninoa xinikiniri atoko. <sup>17</sup> Kristo sākire auiākari ākixinire amaneri itxaua. Mitxi maerekati ikamakiti kona ikamaika. Amanerinoka ikama. <sup>18</sup> Ikara atoko inakari Teosora kaminaua. Mitxi amokaiakari atoko itxa Teoso, iuaritika imikanapiriāua ate iuamoni, kotxi Kristo ipina ate ĩkapani. Ipaniātaua ate asāpiretiniri ikinimane kākiti, Teoso nirekari imikanapiriinina ninoa iuamoni. <sup>19</sup> Teoso mikanapiriāri kākiti ikini itixiti auakani iuamoni, kotxi Kristo ipina kākiti ĩkapani. Teoso mikanapiriākasaakiri kākiti iuamoni, kona iaōtari maerekati ikamakitina. Kona ixinikaikari imaerekanina, ininiā kona imisiritana imaerekani xika. Ia pirena, kākiti imikanapiriini pirena, ipaniātaua asāpiretiniri ikinimane kākiti.

<sup>20</sup> Asāpiretari Kristo sākire kākitimoni. Asākirauata iua ĩkapani, ininiā Teoso iteene oťākikai hĳte ate sākireē. Kristo nireēkiti iaōka ate oťākikai hĳte. Hĳkanapiriāko Teosomoni. <sup>21</sup> Kristo kona kamari maerekati, iuaritika Teoso misiritari iua maerekati kamakari imisiritini atokokana. Ininiā Xesosi sākire aāuikiniā, Teoso apakapaua ate, maerekati makamakani apakapini atoko, kotxi iua kamaerekataua ate.

## 6

<sup>1</sup> Ate parĳkauata Teosokata, ininiā ate iteene oťākikai hĳte. Teoso sikari ikinipoko erekari hĳtemoni, ininiā ! apakata mamaākatakinitika hininiri Teoso. <sup>2</sup> Kotxi Teoso sākire iōkatsopatakori txari:

Erekari kākitimoni nisika. Niketo apokasaaki, uasaaki nikenakotari hākiritinino nota. Kākiti maerekani nimakatzakini oťisaaki, nimoianatai hĳte. Nisāpiretai. Uatxa apokapeka Teoso keto erekari kākiti-moni isikini. Uatxa Teoso makatzakari kākiti maerekani.

*Teoso Nitiriakori Atão Inakani*

<sup>3</sup> Kona xatiki akerokari akamakiti kăkitimoni, ininiã kăkiti kona txari: “Ninoa kerokari ikamakitina, atão minakati isăpiretiniua,” !itxana. <sup>4</sup> Teoso nitiriakori atão atxaua. Aăuini ikiniôtika oerekari kăkiti Teoso nitiriakori atão inakani aniniua, kotxi amîteenekari amaxikiko. Amîteenekari amisiritiko. Amîteenekari katsiiri. <sup>5</sup> Teoso nitiriakori atão atxaua, kotxi Teoso parîka akamini xika anoropataăkapeka. Kateia âki atakaăkapeka. Ahoaătaă kăkiti apotiitakaniua naiatapekaua. Teoso parîka akamini, pasăpaniri aparîka. Itokata !aimaka. Itokata anatxita. <sup>6</sup> Kăkiti imarotari ate Teoso nitiriakori aniniua, kotxi kona akamari maerekati. Aimarotari Teoso săkire. Kona katimari aomanăkarauatini. Amoianatari kăkiti. Erekari Matamatakoti oerekaua atão akamini. Atão atiretari kăkiti. Ikara atoko aniniã, kăkiti imarotari Teoso nitiriakori aniniua. <sup>7</sup> Ate Teoso nitiriakori atão atxaua, kotxi atão inakaranoka asăpireta. Teosora sikaposotiiretaua. Erekari akamakiti aîkeeko akikomoni, asanaremoni pakini atoko itxa, kotxi erekari akamakasaaki, maerekati iokanataăka. <sup>8</sup> Teoso nitiriakori atxaua, ininiã apanakini kăkiti paxitaua. Txamari apanakini kăkiti kona paxitaua. Apanakini săkire: “Peerekana ninoa.” Txamari apanakini săkire: “!Erekana ninoa.” Apanakini săkire: “Kamisirienererini ninoa,” iuaritika atão inakaranoka asăkire. <sup>9</sup> Minakaniua ate, iuaritika ikinimane imarotaua. Kaiăokatani apinaarita, iuaritika aăuapanika. Amisiritaăka, iuaritika kăkiti kona okapanikaua. <sup>10</sup> Amatinaniuatakasaaki, Apiananiri kamapoxokonitaua ate. Kona katxineiroteua ate, iuaritika atxîkitakari kaiăopokori kăkiti ikini sereti erekari Teoso sikakiti apakapinina. Minakani atxaua, iuaritika ikinipoko erekari Apiananiri sikakiti aua atemoni.

<sup>11</sup> Hîte Korîto sitatxiti auakani asăpiretai ikinipoko axinikakiti. Nikipatakiti !auari. Iteene atiretai hîte.

<sup>12</sup> Ate nirekari atiretinii hîte, txamari kona hîte nirekari

hĩtiretiniua ate. <sup>13</sup> Uatxa nimisãkiretai hĩte namariteakori nimisãkiretini atokotxikana. Hĩtiretauako ate, ate tiretini atokotxikana. Hõerekaua hĩtiretiniua ate.

*Xesosi Sãkire Mauiãkani Moianariakori !Hĩtxapeua*

<sup>14</sup> Xesosi sãkire mauiãkani moianariakori !hĩtxapeua, kotxi !apakata erekari kaikotini maerekatikata. !Apakata pokamara iƙanõkarikata auini. <sup>15</sup> Kona Kristo moianatari Satanasi. Xesosi sãkire auiãkari nireẽkiti ãti. Xesosi sãkire mauiãkati nireẽkiti ãtião. Ininiã !apakata Xesosi sãkire auiãkari auini Xesosi sãkire mauiãkatikata. <sup>16</sup> Teoso misãkiretiko aikoti ãki !auari kãkiti kamakiti teoso. Aĩto Teoso misãkiretiko aikoti atoko itxa. Teoso ãtipirika auakari itxaua. Iua txari:

Nota auako ninakitiakorikata. Nitĩpokota ninoa sauaki.

Ninoa Teosone nitxauako. Nota nakitiakori itxauanako ninoa.

<sup>17</sup> Ininiãkara hĩtakanapanako nisãkire mauiãkani. Kona ninoakata !hãuape. !Hĩkaikotape maerekati takote, ininiã napakapai hĩte.

<sup>18</sup> Ininiã hĩri nitxauako. Namariteakori, namariteakoro hĩtxauako hĩte, itxa Apiananiri, Kaposotiireri sãkire.

## 7

<sup>1</sup> Nitiretakini ikara atoko itxa Teoso kamaenetakiti ate iƙapani. Ininiã matakapanari ikinipoko maerekati aĩto txikotakari, aãkixinire txikotakari pakini. Teoso nakitiakorinoka matxaua. Erekarinoka makama Teoso apaxitini.

*Paoro Poxokoni*

<sup>2</sup> Hĩtiretauako ate. Kona amisiritari kãkiti. Kona aõerekari kãkiti maerekati ikamini. Kona amisirienetari kãkiti. <sup>3</sup> Kona ikara atokoni nitxa hĩte nitxitini iƙapani. Kona nitxitai, kotxi nisãpiretapekai iteene atiretini hĩte. Ininiã ipĩkitxi kona oiarikaua. Auakari kona oiarikaua.

Ate oiarikakari !auari. <sup>4</sup> Nimarotari hĩte kaminiri nota õtãkikakiti iaõka. Nota iuikai hĩte. Hĩte kamataparax-iniretano nota. Amaxikaãkapika, iuaritika iteene nipoxononiuaata.

<sup>5</sup> Masetónia tixini ate apokasaaki, kona aiotoka. Kona atomata, kotxi asinimoni aua kãkiti ate misiritakani. Kãkiti naiataua. Aãkixinireẽ apĩkarauata. <sup>6</sup> Teoso, mĩkapiritari kãkiti matinaniuatakani, ininiã imĩkapiritaua ate Txito apokasaaki. <sup>7</sup> Iua apokini kamapoxokonitaua. Apaka isãkire kamapoxokonitaua, kotxi isãpiretaua hĩte kamapoxokonitini iua. Isãpiretaua ate hĩte kinirão aõkitaka ininino nota. Isãpiretaua, hĩte maerekaxinireni, kotxi hĩtxĩkitakano maerekaxinire ninini. Isãpiretaua hĩte ãtipirika sãpiretiniri apanakini nota kamakiti ereka inini. Txito sãpirena nikenakotakasaaki, apia nipoxononiuaata.

<sup>8</sup> Mitxi niokanatsopatakiti hĩtemoni maerekaxinireti txĩkitakai hĩte, iuaritika erekari niokanatiniri iua niõkat-sopatakiti hĩtemoni. Merepanika nota matinaniuata, kotxi nimarotari niokanatsopatakiti hãtatsopatini xika hĩte matinaniuata. Mapaõtinoka maerekaxinireni hĩtx-  
 aua. <sup>9</sup> Uatxa poxokopekano nota. Na nipoxononiuaata hĩte maerekaxinireni nitxĩkitakini ĩkapani. Nipoxononiuaata, kotxi maerekaxinireni hinini xika, hĩtakanapari maerekati hĩkamakiti. Iuasaaki hĩkanapiriã Teosomoni. Teoso apokaerekatari ikara atoko inakari hi-maerekaxinireni, ininiã kona ate misiritai. <sup>10</sup> Erekari Teoso txĩkitakiniri kãkiti matinaniuatini, kotxi iuasaaki kãkiti takanapari maerekati ikamakiti. Ikanapiriã Teosomoni, ininiã Teoso makatxakari iua maerekani. Ikara atoko inakari matinanitxi erekari. Txamari kãkiti Teoso manirekakani matinani ãtião, ininiã ninoa ipinapikako. <sup>11</sup> Hĩte matinaniuata himaerekani xika, ininiã Teoso kamaerekatai. Ininiãkara uatxa erekarinoka hinireka hĩkamini. Uatxa iteene hinirekari hĩkaminiri Teoso

nireẽkiti. Hinirekari ikinimane imarotiniiri hĩkamakiti ereka inini. Uatxa homanitari maerekati mitxi hĩkamakiti. Maerekaxinireti hĩtxaua himaerekani xika. Uatxa iteene hĩtiraõki aua. Hinirekari himarotiniiri nota pirena, nota ereka ninini himarotini ikapani. Uatxa hinirekari maerekati kamakari misiritiko. Ininiãkara kona hĩkerokari, iua kiki maerekati ikamakasaaki.

<sup>12</sup> Iua iõkatsopari mitxi niokanatakiti hĩtemoni, niõkatsopata hĩte ikapanikara. Kona iua maerekati kamakari ikapanini niokanatsopata. Kona iua maerekati kamakari misiritakiti ikapanini niokanatsopata. Niokanataru iua iõkatsopari hĩtemoni atiraõki himarotini ikapani. Teoso imarotari atiretinii.

<sup>13</sup> Ininiã ate kamataparaxiniretaãka, kotxi hĩte kamataparaxiniretaãka apaka. Apaka apoxokoniua, kotxi Txito poxokoniua. Iua poxokoniua, kotxi hĩte himakinika kamapoxokonitari iua. <sup>14</sup> Txito hĩtemoni isini apisapanika, nota sãpiretari iua niuikinii hĩte, kotxi peerekai hĩte. Atão nisãkire, kotxi kona nipẽtauata hĩkamakiti xika, kotxi hĩkamakiti atão. Atãonoka asãkire hĩtemoni. Atãonoka asãkire Txitomoni apaka ate iuikinii hĩte. <sup>15</sup> Apiaãpota Txito tiretinii, kotxi hĩkamari iua sãkire iaõka. Imarotari hãpakapiniri iua hĩpaxitiniritika. <sup>16</sup> Nipoxokoniua, kotxi nimarotapitikari hĩkaminiri nõtãkikinii iaõka.

## 8

### *Txineiro Apanakini Sikakito*

<sup>1</sup> Nitariakori, anirekari asãpiretinii Teoso misãkiretikoãtaã apotiitakaniua Masetõnia tixini auakani. Peerekari Teoso kamakiti ninoa ikapani, kotxi ikinipoko erekari isika ninoamoni. <sup>2</sup> Ninoa ! iteene kauarena. Pasãpaniri ninoa misiritiko, iuaritika ienenĩkana ninoa. Na katxineiroteni, iuaritika ipotxitarina itina isikinina kãkiti kaamonirinimoni.



<sup>3</sup> Nota imarotari ninoa minakati auiniãna, isikarauatana apanakinimoni. Iteene isikarauatana, ininiã kaiãokatani inatxitana. <sup>4</sup> Nota kona amanaãri ninoa txineirote kãkiti Teoso nakitiakori Xerosareẽ sitatxiti auakani ïkapani, iuaritika ninoaka txano: “Ate nirekari txineiro asikini ninoamoni. Pauiritaua asikiniro ninoamoni. Asikiniãro apoxokoniuaata, kotxi ikara atoko akamini amoianatari kãkiti Teoso nakitiakori,” itxana. <sup>5</sup> Kona ikarananini ninoa nireka. Iteene ninoa kamapoxokonitaua ate, kotxi mitxipe ninoa txaua: “Ate nirekari Apiananiri nireẽkiti akamini,” itxana. “Iua oerekiniãri inireẽkiti hĩtemoni, ate nirekari hĩte paniãtakiti apaka akamini,” itxana Masetõnia tixini auakani. <sup>6</sup> Txito amanaãpekai hĩte txineiro hĩsikini Xerosareẽ sitatxiti auakani ïkapani, ininiã apaniãtari iua sini hĩtemoni hĩsikakiti apakapini ïkapani, hĩtiraõki ninoa Teoso nakitiakori hõerekini ïkapani. <sup>7</sup> Hĩte iteene auikari Xesosi sãkire. Apanakini poiãoka. Hĩte imarotari Xesosi sãkire hĩsãpiretini kãkitimoni. Apanakini na iteene imarotari. Hĩte iteene imarotari Xesosi sãkire. Apanakini poiãonoka imarota. Hĩte iteene nirekari Teoso parĩka hĩkamini. Apanakini poiãonoka nirekari. Hĩte iteene tiretaua ate. Apanakini poiãoka tiretaua. Hĩte apiaerekata, ininiãkara ninirekari hĩsikakiti apaka apiari inini, kotxi ikara atoko hĩkaminiã, hõerekari Xerosareẽ sitatxiti auakani hĩtiretinina.

<sup>8</sup> Kona nipaniãtai nitapararitika hĩsikiniro hĩtxineirote ninoamoni. Nataerekatari hĩtiraõki. Atão atxiĩti hĩtirtari apanakini? Masetõnia tixini auakani atão tirtari apanakini. Hĩte tiraõki ninoa tiraõki atoko atxiĩti? <sup>9</sup> Himarotari Apiananiri Xesosi Kristo sikari ikinipoko erekari hĩtemoni. Itanapoko auiniri Xesosi Teoso tixine auakasaaki. Iuaritika itakanapari ikinipoko. Minakati mauakinitinoka itxapeka hĩte ïkapani. Ininiãkara ikinipoko itakanapini xika, ikinipoko aua hĩtemoni.

<sup>10</sup> Uatxa nota õtãkikai hĩte, erekari hĩkaminiri hĩsãkire iaõka, kotxi kita anokanani hĩte merepanika xinikari: “Natokopa itxa akaminiri Xerosareẽ sitatxiti auakani ĩkapani?” hĩtxa. Hĩte merepanika nirekari txineiro hĩsikinina ninoa. <sup>11</sup> Ininiã nõtãkikai uatxa. Hĩkamariko mitxi hĩsãkire iaõka. Hĩpoxokoniritika hinirekariko hĩokanatiniro txineiro ninoamoni, ininiã erekari hĩpoxokoniritika hĩkaminiri hĩsãkire iaõka. Ipixini txineiro hĩtemoni auakaro hĩsikako ninoamoni. <sup>12</sup> Hĩpoxokoniritika hinirekiniãri hĩsakarautini Teosomoni, iua apakapapitikari hĩsikasiti. Poiãoka auiniãi, ininiã erekapitikari poiãonoka hĩsikini Teosomoni. Iua apakapapitikari. Iua imarotari !apakata apikomoni hĩsikiniri.

<sup>13</sup> Kona ate nirekari hĩte kaamoni hinini, ikinipoko ninoamoni auini ĩkapani. Erekari ninoa auakiti hĩte auakititxikana. <sup>14</sup> Uatxa hĩte txineirote auapitika ninoa hĩsikini ĩkapani. ãti õti hĩte txineirote mauakanisaaki, atxiĩti ninoa txineirote aua, ininiã ninoa sikai hĩte. Ininiã hĩte moianatinina atokotxikana, ninoa moianatai hĩte. ĩkara atoko inakari atão. <sup>15</sup> Teoso sãkire iõkatsopatakori txari:

Kiki kaiãopokori apakapakari itetakori ! auari. Kiki poiãoka apakapakari !kaamoniri.

### *Txito Iokanatiko Korĩtomoni*

<sup>16</sup> “Peerekai,” atxari Teoso, kotxi iua sikanireõtari Txito itiretinii hĩte, nota tiretinii atokotxikana. <sup>17</sup> Txito nirekapitikari ate paniãtakiti ikamini, hĩtemoni isini. Apaniãtiniri apisapanika, inirekari hĩtemoni isini, ininiã ĩpoxokoniritika isa hĩtemoni. <sup>18</sup> Aiokanatarari ãti aĩtari iuakata. Ikinimane Teoso misãkiretikoãtaã apotitakaniaua iteene apokaerekatarari iua, kotxi isãpiretari Teoso iokanapirena erekari ikinimanemoni. <sup>19</sup> Ninoa mereĩri iua aĩtari atekata isini Xerosareẽmoni, oa txineiro aanikasaaki. Oa txineiro asikakito oerekana Xerosareẽ

auakani Apiananiri ereka inini. Oerekana apoxokoniritika amoianatinina.

<sup>20</sup> Oa txineiro kaiãopokoro aua, ininiã iua aïtari siniã atekata, iua imarotari atão asikiniro oa txineiro Xerosareẽ auakanimoni. <sup>21</sup> Anirekari atão akamini oa txineiro asikasaaki ninoamoni. Anirekari Apiananiri imarotiniri atão akamini. Anirekari kãkiti apaka imarotiniri atão akamini.

<sup>22</sup> Iuaïkana aiokanatarari ãtipekana aïtari hïtemoni. Aã-taerekatapekari iua. Ipoxokoniritika imoianatarari kãkiti. Apiapoxokonita iua, kotxi imarotari hïte kaminiri mitxi hïsäkire iaõka. <sup>23</sup> Txitopekana, nota moianari itxaua. Iua miparïkatano nota, hïte amoianatini ïkapani. Xesosi säkire auiãkani mereẽna aïtariakori Txitokata sikani hïtemoni. Kãkiti imarotakasaakina ninoa, “Peerekari Kristo,” itxana kãkiti. <sup>24</sup> Ininiãkara hõerekanako ninoa kikiakori atão hïtiretinina, ininiã ikinimane Xesosi säkire auiãkani imarotari atão hïtiraõkiuatini. Iusaakiko ninoa imarotari ate säkire atão inini ate iuikinii hïte.

## 9

<sup>1</sup> Nisãpiretai hïte txineiro asikakito tïkane Teoso nakiti-akorimoni, Xerosareẽ auakanimoni. Nimasãpiretakaniãi hïte, iuaritika hïte nirekari hïtxineirote hïsikini ninoamoni. Nimarotari ikara. <sup>2</sup> Nimarotari iteene hinirekari himoianatinina ninoa. Nitxapekana Masetónia tixini auakani: “Nota iuikana aïtariakori Korïto sitatxiti auakani, Akaia tixini auakani, kotxi kita anokanani ninoa iposope txineiro iokanatinina Xerosareẽmoni,” nitxana. Hïte poxokoni txineiro hïokanatini, sikanireõtana Masetónia tixini auakani apaka iokanatiniro txineiro. <sup>3</sup> Uatxa niokanatanana ninoa aïtariakori ipi ãti pakini hïtemoni. Hïte iposope hininiã hïtxineirote hïokanatini, erekapitikari, kotxi ikara nisãkire iaõka. Ininiã atão ate iuikinii hïte. <sup>4</sup> Masetónia tixini auakani siniã notakata, hïtxineirote miposonitipanika, ininiã ate pëtauata, kotxi

ate auikari hĩsãkire. Hĩtepekana apia pẽtauata hĩsãkire iaõka himakamakani xika. <sup>5</sup> Ininiãkara ninirekari ninoa aĩtariakori sini hĩtemoni nota ereẽ napokini apisapanika. Ninoa moianatai txineiro kaiãopokoro hĩsikaenetakito hãpotiitini ĩkapani. Ininiã napokasaaki ereẽ, iposope hĩsikakito nanikini. Ininiã iuasaaki aimarotariko kinirão sikaenetaka hinakito txineiro. Iuasaaki aimarotariko hĩpoxokoniritika hĩsikiniro hĩtxineirote.

### *Takari Itori Auini*

<sup>6</sup> Ia nisãkire hĩxinika. Poiãoka komiri pitakiniã pitakarauatakasaaki, poiãonoka iri pimaporoka. Kaiãopokori pitakiniã, kaiãopokori pimaporoka. <sup>7</sup> Ininiã pãkixinireẽ pixinikari atão pisikakiti ãtimoni. Kona erekari pimanirekasikatakiniti pisikini. ãti itapararitika paniãtiniãi pisikarauatini, !apakata. Teoso apokaerekatari kãkiti ipoxokoniritika isikarauatini ãtimoni. <sup>8</sup> Teoso posotari ĩkinipoko erekari isikinii hĩte, ininiã ĩkiniõtika ĩkini sereti hiamonitakiti auiniã, hãpakapari ĩkinika hinireẽkiti. Ininiã ĩkinipoko erekari hĩkama. <sup>9</sup> Teoso sãkire iõkatsopatakori txari:

Teoso sikari itori erekari matxineirotenimoni. Teoso kamakiti atão inakari !ixipoka. Auapikako.

<sup>10</sup> Teosora sikari takariki katakarerimoni itakarauatini ĩkapani, ininiã eereka iposope inakasaaki, auari kienatxi inikakiti ĩkapani. Iua atokokana Teoso sikari kaiãopokori takariki hĩtemoni. Iua anekakari hĩtakare, ininiã eereka iposope inakasaaki, kaiãopokori auari, ininiã kaiãopokori hĩkamakiti atão inakari apanakinimoni.

<sup>11</sup> Teoso sikai ĩkini sereti erekari, ininiã ĩkinipoko auape hĩtemoni. Ininiãkara kãkiti mauarenimoni hĩsakariko kaiãopokori. Ate anikasaakiro hĩsikakito apanakinimoni, ninoa txariko: “Peerekari Teoso, kotxi ninoa sikaua ate aamonitakiti,” itxanako.

<sup>12</sup> Ikara atoko inakari hĩkaminiã, hĩsikari Teoso naki-tiakori amonitakiti ninoamoni. Apaka hĩsikasaa-kiri hĩsikakiti ninoamoni, ninoa kaiãopokori txari: “Peerekari Teoso,” itxanako. <sup>13</sup> Ninoa poxokoniuatako, kotxi hĩte sikari kaiãopokori ninoamoni, apanakinimoni apaka. Ni-noa txariko: “Peerekari Teoso,” kotxi imarotarina erekari hĩte kamakiti. Imarotarina hĩte kaminiri Kristo paniã-takiti iaõka. Imarotarina hĩte atão auikiniri Kristo iokanapirena erekari. <sup>14</sup> Ininiã ninoa misãkiretari Teoso hĩte ikapani, kotxi iteene ninoa tiretai hĩte, kotxi Teoso sikari ikinipoko erekari hĩtemoni. <sup>15</sup> Matxari Teoso: “Peerekai pite, kotxi pite sikaua pamarite. ãti pisikakiti iua atoko inakari lauari.”

## 10

### *Paoro Apakapapiretari Apoĩtiko*

<sup>1</sup> Kataparaxinireri Kristo, iuaritika ianaka õtãkikari kãkiti, ininiã nota Paoro ianaka nõtãkikai. Txamari apanakini hĩte sauaki auakani txari: “Paoro ãtakoxiti auakasaaki, itapararitika itxitaua ate, atemoni iõkat-sopatakasaaki. Txamari iua atekata auakasaaki, ipĩkarau-ata amaerekani isãpiretiniua,” itxana. Ikara apanakini sãkire na atão, kotxi ãtakoxiti nauanãta, iuaritika amaãtiki nõtãkikai hĩte. <sup>2</sup> Kona ninirekari noerekinii hĩte apanakini nitxitini ereẽ napokasaaki. Nipositapitikari nitaparar-itika nitxitiniri apanakini ereẽ napokasaaki, kotxi ni-noa txari: “Paoro kamakiti Teoso sãkire mauiãkani ka-makiti atokotxikana,” itxana. Txamari na atão ninoa sãkire. <sup>3</sup> Aĩto tapara poiãoka, kotxi kãkiti atxaua, ininiã aĩto taparaã !apakata anaiatiniri maerekati. Teosora sikataparataua aãkixinireẽ, maerekati anaiatini ikapani. <sup>4</sup> Ate ikeeko kona Xesosi sãkire mauiãkani ikeeko atokoni. Teoso ikeeko isika atemoni. Kaposotiireri Teoso ikeeko, ininiã aposotari Satanasi kamakiti axipokini aiko kaikori

axipokini atokokana. <sup>5</sup> Kākiti iuikaua. ! Inirekarina auikininirina Teoso imarore. “Paimatireua ate,” itxanātana. Teoso sikaimaroretua ate, ninoa sākire paxirari inini aōerekini ĩkapani. Ikinipoko axinikakiti anireka Kristo nireēkiti iaōka axinikini, ininiā axinikakiti ātiāo auiniā, atxĩkitakari iua axinikakiti imamakini Kristo nireēkiti iaōka inini ĩkapani. <sup>6</sup> Hĩte iteene kamakasaakiri Kristo nireēkiti iaōka, ate misiritariko kākiti ereē Kristo nireēkiti imakamakanisaaki.

<sup>7</sup> Hĩte xinikari hātamatakitinoka. Kona hĩxinikari kākiti ākixinireē auakari. Kākiti ereē uākatiniāri Kristo nakiti ininiuana, erekari imarotininirina ate apaka Kristo nakiti-akori aniniua, ninoa Kristo nakiti ininiuana atokotxikana. <sup>8</sup> Atxĩiti iteene niuikari Apiananiri sikaposotiiretiniua ate, iuaritika kona nipētauata niuikiniri ikara, kotxi Apiananiri sikaposotiiretaua ate, hĩte akamataparaxiniretini ĩkapani. Kona ate nirekari hĩte ākixinire tapara poiāoōpotini. <sup>9</sup> Kona ninirekari hĩpĩkarauatini, iōkatsopari niokanatsopatakiti hātatsopatini xika. <sup>10</sup> Apanakini txari: “Paoro txitaua itapararitika iokanatsopatakitiā, txamari iua atekata auakasaaki, isākire ātiāo. Iuasaaki kona kataparaxinireri iua. Iuasaaki ipĩkarauata ate itxitini,” itxana apanakini. Na atāo ninoa sākire. <sup>11</sup> Ītakoxiti ate auakasaaki, asākire aiokanatsopatakiti iuatxikana asākireta, ereē hĩtekata aāuakasaaki.

<sup>12</sup> Ninoa ate misākirepiretakani iteene iuikaua. Atauako ninoa apiaerekata? Atauako !erekaua ate? ! Kiĩkitena ninoa. Ninoa uākatari ninoa kamakitinoka erekari inini, ininiā ninoa iaōtari apanakini kamakiti. Apanakini kamakiti ninoa kamakiti atoko ininiā, ninoa uākatari apanakini kamakiti apaka erekatxikana. Txamari na atāo. <sup>13</sup> Atepekana, kona ate iuikari ateka kamakiti. Ate iuikari parĩkatxi Teoso sikakiti atemoni akamini ĩkapani. Iuanoka ate iuika. Iua paniāttaua aparĩkauatini hĩte ĩkapani. Iua aparĩka ate iuikapitika.

<sup>14</sup> Teoso paniātakinoka akama. Ia aparīka, ininiā ate sari hītemoni Kristo iokanapirena erekari asāpiretini īkapani. Ininiā apakatapitika ate iuikiniri ikara aparīka. <sup>15</sup> Apanakini parīka Teoso īkapani ate kona txari: “Iua parīkatxi ate kamakiti,” kona atxa. Ate nirekari hīte auikaāpotiniri Kristo sākire, Kristo sākire iteene hāuikini īkapani, ininiā ate nirekari aparīkauatini Teoso īkapani hīte auiniātaā, Kristo sākire apanakini auikini īkapani. <sup>16</sup> Ate nirekari Kristo iokanapirena erekari asāpiretiniri kākiti, hīte tixine apiko auakani Xesosi sākire masāpiretakotipanika ininiātaā. Ininiā kona aparīkauata apanakini parīkauatiniātaā. Ininiā apanakini parīka: “Ate parīkakara iua,” kona atxari.

<sup>17</sup> Teoso sākire iōkatsopatakori txari:  
 Pinirekatari piuikarauatini? Pinirekiniāri, ininiā  
 piuikariko Apiananiri kamakitinoka.  
<sup>18</sup> Teoso kona apokaerekatari kākiti iuaka, “Erekapi-  
 tikano,” inakari. Teoso sāpiretiniāri: “Erekapitikari iua  
 kākiti,” ininiā Teoso apokaerekatari iua.

## 11

### *Teoso Maiokanatakini*

<sup>1</sup> Atxiīti miīkiteti sākirauatini atoko nimisākiretai hīte, iuaritika hāuiritano nota. <sup>2</sup> Teoso nirekinii hīte iua naki-  
 tiakorinani hininiua, iua atokotxikana nota nirekai hīte  
 Teoso nakitiakorinani hininiua. Nisikaenetai Kristomoni  
 hītaniri atoko inini īkapani. Iuamoninani nisikaene-  
 tai. Ninirekari iuamoni nisikinii, ātokoro kikikata  
 masirīkakato atoko inakaro. <sup>3</sup> Kitxakapirīka Satanasi  
 auaiītotari imini. Iua imini misirienetaro Eva, kotxi  
 paimatireri Satanasi sākire. Nipīkari Satanasi misiriene-  
 tinii hīte apaka, ininiā eereka hīxinikakiti na atāoni.  
 Nota pīkari Xesosi hītakanapini. Mitxi iteene hītiretari

iuu. Iuananira hĩtireta. <sup>4</sup> Kotxi hĩte apakapari hĩpox-okoniritika ikinimane ereẽ apokakani, “Ate Xesosi sãkire sãpiretakaniua” inakani, txamari Xesosi pirena ninoa sãpiretakiti na atãoni. Kona ate sãpiretari ikara atoko inakari, iuaritika hãuikari ninoa sãkire. Hãuikasaakiri ninoa sãkire, atxiĩti hãpakapari matamatakoti, txamari kona hãpakapari Erekarĩ Matamatakoti ate sãpiretakiti. Ate sãpiretai hĩte atão Kristo iokanapirena erekari, txamari hĩte auikari ãtião.

<sup>5</sup> Hĩtemoni, Teoso iokanatana ninoa kãkitimoni. Hĩtemoni, ninoa Teoso iokanatakini apiarini. Nota poião atxiĩti? Ninoa apiata atxiĩti? Konapitini. <sup>6</sup> Atxiĩti kona nota iteene imarotari nisãkiruatini, iuaritika nimarotapitikari Teoso sãkire. Himarotapekari ikara atoko inakari, kotxi asãpiretapekai.

<sup>7</sup> Teoso iokanapirena erekari nisãpiretakasaakii hĩte, maxikatiĩka nisãpiretai. Kona ninirekari hĩikitxitinino, ininiã nota poiãotakaua, hĩte atão inakari himarotini ĩkapani. Ikara atoko nikerokatari atxiĩti? <sup>8</sup> Hĩtekata nĩparĩkauatakasaaki, kãkiti ãtiãtaã Xesosi sãkire auĩãkani iokanataro txineiro notamoni, txamari kona nota moianatana ninoa iuasaaki. Hĩtekara nimoianata iuasaaki. <sup>9</sup> Hĩtekata nauakasaaki, nota nirekamaro txineiro. Txamari kona nota amanaãĩ hĩtxineirote. Aĩtariakori Masetõnia tixinikini mininano itanapoko niamonitakiti. Iua atokotxikana kona namanaãpaniro hĩtxineirote nota ĩkapani, kotxi atxiĩti nota minari atoko nitxa hĩporikiã. Kona ninirekari ikara atoko inakari nininiua. <sup>10</sup> Kristo atãonoka isãkire. Isãkire nãkixinireẽ auape, ininiã nota sãkire apaka atão. Nisãpiretapanikari kãkiti hĩtxineirote nimanirekakani pirena. !Auari ikara nisãkire iotokakakari ikinika Akaia tixiniã. <sup>11</sup> Kinirepa ikara atoko nitxa sãkireta? Atxiĩti kona nitiretai hĩte? Teoso imarotari nota iteene tĩretinii hĩte.



<sup>12</sup> Uatxa iuaīkana nisāpiretai hītixineirote nimapakapakani. Nanera kākiti uatxa hītekata auakani Teoso maiokanatakini txari: “Ate kamari Paoro parīkatxikana,” itxana. Ikara atoko ininiā iuikauana. Txamari ninoa parīka ātiāo, kotxi ninoa apakaparo hītixineirote. Ate kona apakaparo hītixineirote. <sup>13</sup> Teoso kona iokanatana nanera hītemoni. Na atāo Teoso iokanatakini litxauana. Imisirienetaina hīte, “Aparīkauata Teoso īkapani,” inakasaakina. Nanera txari: “Kristo iokanatakini raua ate,” itxana. Txamari na atāo nanera sākire. <sup>14</sup> Ikara atoko inakari auapitika, kotxi Satanasi sari kākitimoni. Itxari: “Nota Teoso nitiri nitxaua. Nota oerekai atāo inakari.” Ininiā iua sākire auiākani auapitika. <sup>15</sup> Ininiākara nanera kikiakori Satanasi nitiriakori txari: “Atāo inakari kamakanua ate. Teoso nitiriakori atxaua,” itxana. Xipokatxi ōtisaaki imisiritaākanako ninoa maerekati ikamakitina xika.

### *Paoro Misiritiko Pirena*

<sup>16</sup> Iuaīkana nisāpiretai. Miīkiteti ! nitxaua, iuaritika hīte potxitari kākiti miīkiteni, ininiā miīkiteti atoko niuikaua, kotxi nota posotari niuikiniua. <sup>17</sup> Apiananiri kona sākirauata ia atoko. Miīkitetinoka sākirauata ia atoko iuikiniua. <sup>18</sup> Nanera kikiakori iuikaua, Teoso sākire mauīākani iuikiniua atokokana, ininiā nota apaka sāpiretari niuikiniua. <sup>19</sup> Hīte auiritari kākiti miīkiteni himoianarini ininiua, kotxi ! kiīkitei hīte. <sup>20</sup> Nanera hītekata auakani txīkitakai hīte initiriakorina hininiua. Hīte auiritari ikara atoko inakari. Nanera amanaaāpotari ikini sereti hīte nakiti. Ikamarina inireēkitina hītemoni. Ipaniātaina ikiniōtika inireēkitina hīkamini. Imisiritaina hīte. Hīte auiritari ikara atoko inakari ikaminina. <sup>21</sup> Erekari nipētauatini atxiīti? Kotxi kona kataparaxinireno nota nanera kamakiti atoko nikamini hītemoni. Kataparaxinirena nanera.

Ikamakitina iuikana, ininiã miĩkiteti atoko kataparax-inireno nota. Nikamakiti niuikako. <sup>22</sup> Nanera Epirooakorikani? Ari. Nota apaka Epiroo nitxaua. Nanera Isaeo apika mekaniriakorikani? Ari. Nota apaka Isaeo apika mekaniri nitxaua. Nanera Apraõ apika mekaniriakorikani? Ari. Apraõ apika mekanirikanarano nota apaka. <sup>23</sup> Nanera Kristo nitiriakorikani? Atxiĩti. Miĩkiteti iuikiniua atoko nitxa: “Kristo nitiri apiaerekatakari nitxaua nota.” Nota apia parĩkauata Teoso ikapani. Apiata nimisiritiko, kotxi kaiãokatani kateia åki nitakaåka. Kaiãokatani nota noropataåka aåpitsaå. Kaiãokatani nipiinaarita. <sup>24</sup> Ipi ipi åti pakinikata Xoteoakori noropatano aåpitsaå. Iuasaaki inoropatanona trĩta novi pakinikata. <sup>25</sup> Ipi åti pakinikata Homanoakori noropatano aåkeẽ. Åtikata kai soroå nikiporonakaåka. Ipi åti pakinikata maporoå nisikasaaki, maporo sakika apanĩkakiå. Åti ikanõkati, åti pokamarariti pakini ninapa potxoari uiniti nipimakaåtini. <sup>26</sup> Nianaxititapika. Natamonõkonitari uini torõkani. Natamonõkonitari kiĩtiririni. Natamonõkonitari ninirimane. Natamonõkonitari ninirimane minakaniua. Natamonõkonitari sitatxi nauakasaaki, kåkiti mauakaniåtaå nauakasaaki, potxoari uiniti nĩpiriåtakasaaki pakini. Natamonõkonitari kåkiti, “Xesosi såkire aåuika” inakanikata nauakasaaki, kotxi na atåo ninoå såkire. <sup>27</sup> Kaiãokatani nisåpaka itori parĩkatxi xika. Kaiãokatani nitsii aua. Kaiãokatani kona apakata nimakini ikanõka. Kaiãokatani ninatxita, niposonata. Kaiãokatani nipokori !auari. Kaiãokatani nimĩteenekari katxĩkareri. Kaiãokatani nimåka !auari. <sup>28</sup> Ikara atoko inakari monõkori auapika notamoni. Apaka niparĩka kasåpaniri aua, kotxi ikiniõtika niparĩkauata kåkiti Teoso misåkiretikoåtaå apotiitakaniua ikapani. <sup>29</sup> Åti iõkape-tiniå, nota apaka niõkapeta. Åti txĩkitakaåka maerekati ikamini, ininiã nota maerekaxiniretinoka nitxa.

<sup>30</sup> Hīte nirekiniāri niuikiniua, ininiā niuikari niōkapere.  
<sup>31</sup> Aauīte Xesosi Kristo iri, Teoso imarotari nisākire atāo inini. Ātipirika matxari: “Peerekai.” <sup>32</sup> Tamásiko sitatxiti nauakasaaki, kākiti auīte apiari Areta inakori auakasaaki, Tamásiko auakani auīte paniātari sotatoakori kaikotini sitatxi kākiti ĩronakiniātaā nota imaīkinina ĩkapani. <sup>33</sup> Txamari kona nota pokīka sitatxi toreātaā. Niīroā kotari mitari āki. Iuasaaki aītariakori iokatxakano aapokotxi sonaā sitatxi pirikere mapara. Ixitipe apoka nitxa. Ikara atoko itxa nimatekini, ininiā kona ninoa maīkano iuasaaki.

## 12

### *Taponetxi Teoso Sikiniri Paoro*

<sup>1</sup> Hinirekatari apikomoni niuikiniua? ! Apakata, iuaritika hinirekiniāri, niuikapanikauako, kotxi Apiananiri sikano taponetxi peereri. Iua oerekano imarore. <sup>2</sup> Akokaxiti katosi anokanani inakasaaki, nanikaāka Teoso tixinemoni iaxiti apiko nopinixiti. Iuasaaki nitaponeuataako? Atxiīti niīto atāo anikaākauako? Kona iteene nimarotari. Teosonokara imarotari. <sup>3</sup> Ianoka nimarota. Nanikaāka Teoso tixinemoni nitaponeē atxiīti, atāo niīto anikaāka atxiīti. Teosonoka imarotari. <sup>4</sup> Iuaxiti nikenakotari sākiretxi erekari. Ikara kona nimarota iuaīkana nisāpiretini. Apaka ! auiritaāka nisāpiretiniri kākiti. <sup>5</sup> Ninirekiniāri, niuikari nitapone ikara atoko inakari, txamari ! apakata notaka niuikiniua. Niōkaperenoka niuika. <sup>6</sup> Ninirekiniāri niuikiniua, atāonoka nisāpireta, kotxi kona miīkiteti ! nitxaua. Txamari kona ninirekari niuikiniua, kotxi atxiīti kākiti uākatari nota apiari nininiua. Ninirekari kākiti atāo imarotininino. Erekari kākiti imarotininino nisākireē, nikamakitiā pakini.

*Paoro Misiritiko Inako Tsii Atoko Inini*

<sup>7</sup> Peerekari nitikakiti Teoso tixine nanikikosaaki, iuaritika Teoso kona nirekari niuikiniua, ininiākara Teoso auringitari Satanasi misiritinino niĩtoã. Katsiiri. Inako atoko itxa niĩtoã, ininiã niuikiniua lauari. <sup>8</sup> Ipi āti pakinikata namanaāri Apiananiri ia nitsii imakatzakini. <sup>9</sup> Txamari itxano: “Kona nimakatzakari. Ikinipoko erekari nisikakiti sikataparatai. Iuanoka pinireka. Piōkapetakasaaki, nota tapara pākixinireē apiata,” itxano. Ininiākara nipoxokoniritika niuikari niōkapere, kotxi iusaaki nimarotari Kristo posotiire nākixinireē auini. <sup>10</sup> Niōkapetakasaaki, nipoxokoniuaata. Nixiniketikosaaki, nipoxokoniuaata. Nimaxikikosaaki, nipoxokoniuaata. Nimisiritikosaaki, nipoxokoniuaata. Nikamakiti tĩkane nimimarotakanisaaki, nipoxokoniuaata. Ikara atoko inakari nimĩteeneka nipoxokoniritika, kotxi Kristo nakiti nitxaua. Niōkapetakasaaki, nitapara nākixinireē apiata.

*Paoro Nirekari Erekari Korĩto Auakanimoni*

<sup>11</sup> Miĩkiteti sākirauatini atoko nisākirauata, txamari hĩte xika nisākirauata miĩkiteti sākirauatini atoko, kotxi hĩte iukaākamanoko nota, kona nota nirekamariko niuikiniua. Minakati nitxaua, iuaritika nanera Teoso maiokanatakini hĩtekata auakani kona apiarekata. <sup>12</sup> Hĩtekata nauakasaaki, nikamakiti oerekai atão Teoso iokanatakiti nininiua, kotxi iusaaki noerekai Teoso oerekakiti kãkitimoni. Noerekai kãkiti maposotakiniti. Noerekai posotiiretxi iusaaki. !Asãpaka ikara atoko inakari aōerekinii hĩte. <sup>13</sup> Atxiĩti apiata nitiretatari apanakini Teoso misãkiretikoãtaã apotiitakaniua ātiãtaã auakani? Konapitini. Ninoa nitiretini atokotxikana nitiretai hĩte. Namanaãna ninoa txineirote niamonitakiti ĩkapani. Hĩte txineirote kona xatiki namanaãi, ininiã nikerokatari atxiĩti? Himaxinĩkaretariko ia nikerokakiti.

<sup>14</sup> Ipikata nisipeka hĩtemoni. Naiamatapeka iuaĩkana hĩtemoni nisini tĩkane. Kona hĩtxineirote kona namanaãpanii. Hĩtxineirote kona ninireka. Hĩtera ninireka.

Amarini kona nīkatana iri, inoro pakini. Iri, inoro pakinira nīkatana imiakori. Nota hīri atoko nitxaua. <sup>15</sup> Nipoxokoniuata ikinika nota nakiti nisikinii hīte. Notaka nisikaua hītemoni. Nipoxokoniritika nisikai. Txamari nota tiraōki hīte ikapani apiaāpotakasaaki, hīte tiraōki nota ikapani poiāoāpota.

<sup>16</sup> Atāokani ikara atxiīti? Iuaritika ia nimarota. Kona xatiki namanaāi hinakiti hīsikinino. Atxiīti āti ereē auakari txari: “Paoro misirienetau ate. Paxirari isākire,” itxa atxiīti. Txamari ikara na atāo. <sup>17</sup> Natokopa nitxa nimisirienetini? Atauako kikiakori hītemoni nota iokanatakini misirienetai hīte? !Imisirienetaina. <sup>18</sup> Nōtākikari Txito hītemoni isini tīkane. Nipaniātari āti aītari iuakata isini. Atauako Txito misirienetai hīte? Konapitini. Erekarī Matamatakotira anikano nota. Iua apaka anikari Txito. Nota sari Xesosi nirekinimoni. Txito apaka sari iua nirekinimoni.

### *Paoro Pīkare*

<sup>19</sup> Atxiīti hīte xinikari ikara asāpiretai, ate ereka anini himarotini ikapani. Konapitini. Ate sākirauata hītekata Kristo sākirauatini atokokana, kotxi Teoso atamataua. Ate tirketakini hītxaua hīte, ininiā ikinipoko akamakiti akaminii hīte, hīte ākixinire tapara auini ikapani. <sup>20</sup> Nipīkarauata ereē napokini, kotxi atxiīti hīte kamari nimanirekakiniti. Atxiīti napokasaaki ereē, kona hīte apokaerekatano nota. Ereē napokasaaki, nipīkari nimarotini hīte txitakakiniua, hīxikotakakiniua, homanatakakiniua, hīpotxinani auini, himisākirepiretakakiniua, aāpirena hīsāpiretini, hīuikiniua, hineenamauatini. Ikara nimarotini nipīka, ereē napokasaaki. <sup>21</sup> Ininiā hītemoni napokasaaki, nipīkari Teoso kamapētatinino nota hīte maerekani xika. Nipīkari nitxiapatini maerekati hīkamakiti xika, kotxi kaiāopokori kamari maerekati akokaxiti,

iuaritika !itakanapapanikari iua maerekati. Ixinikakitina maerekatinoka. Maerekati ikini sereti iĩtona nireėkiti aua. İtanoro minakotokatika isiriřkana. Ikara atoko inakari kona itakanapapanikana.

## 13

### *Paoro Săkire İmapotėkire Őtăkikare*

<sup>1</sup> İpikata nota sari hĩtemoni. İuaĩkana hĩtemoni nisako. Teoso săkire iėkatsopatakori txari:

İpi āti pakini kăkiti atamatiniāri maerekati āti kamakiti, ninoa săkire auikaăka, ininiă iua maerekati kamakari misiritaăkako. İpi kăkiti atamatiniāri maerekati āti kamakiti, ninoa săkire apaka auikaăka, ininiă iua maerekati kamakari misiritaăkako,

itxa Teoso săkire. <sup>2</sup> Akokaxiti hĩtekata nauakasaaki, nőtăkikapekai himaerekani hĩtakanapini. İuasaaki nőtăkikana mitxi maerekati kamakani, apanakini apaka. Nitxana: “Ătikata uai napokasaaki, nimisiritapitikari ikinimane maerekati kamakani,” nitxapekana. İuaĩkana uatxa itakoxiti nauakasaaki, ikara nisăkiretxikana nisăpiretai hĩte. <sup>3</sup> Hĩte nirekari himarotiniri: “Atăokani atxiĩti Paoro săpiretari Kristo săkire?” hĩtxa. Napokasaaki ereė, himarotapitikariko atăo nisăpiretiniri Kristo săkire. Kristo !iėkapeta. Oerekapekai iposotiire hĩte sauaki. <sup>4</sup> Kristo okikosaaki aamina ĩpiriămitakari nopini, iĩto iėkapere aua. Uatxa kataparari iua, kotxi Teoso sikataparatarari iua. Ate ĩto apaka iėkapeta, mitxi Kristo ĩto iėkapetini atoko, iuaritika Teoso sikataparataua Kristokata aăuini hĩte amoianatini ĩkapani.

<sup>5</sup> Hĩxinikariko hăkixinireė auakari. Atăokani hăuikatari Teoso săkire? Hĩteka ataerekatauako. Himarotatarari Xesosi Kristo hăkixinireė auini? Teoso săkire hăkixinireė mauakaniă, Kristo Xesosi !auari hăkixinireė. <sup>6</sup> Ninirekari himarotiniri Kristo Xesosi auini ate Ăkixinireė. <sup>7</sup> Ate

misākiretari Teoso, maerekati hīte makamakani īkapani. Kona ate nirekari kākiti sākire: “Peerekari Paoro. Iua imarotapitikari Teoso sākire oerekini, kotxi Korīto sitatxiti auakani kamari Teoso sākire iaōka.” Ikara kona ate nireka, ate iuikiniua īkapani. Atxiīti kākiti uākatari Xesosi Kristo !auari ate ākixinireē, iuaritika ate nirekari hīte kaminiri atāonoka. <sup>8</sup> !Apakata aiotokakiniri atāo inakari. Atāo inakari auapika. Atāo inakari !ixipoka. Apakata aōerekiniri atāo inakari. <sup>9</sup> Atxiīti ate iōkapeta, iuaritika apoxokoniuata hītaparaxinire akenakoenetakasaaki. Ate misākiretari Teoso hīte atāonoka hīkamini īkapani ikiniōtika, Xesosi sākire iaōka hīkamini īkapani. <sup>10</sup> Ikara atoko inakari niōkatsopata hīte īkapani hītekata ni-mauakanisaaki, kotxi ereē napokasaaki, kona ninirekari nitxitinii hīte. Niposotapitikari nitxitinii, kotxi Apiananiri sikaposotiiretapekano atāo nikamini hītemoni. Txamari kona ninirekari Xesosi sākire hītakanapini, nota txitini xika. Ninirekari hīte kataparaxinire hinini, Xesosi sākire iteene hāuikini īkapani.

<sup>11</sup> Nitariakori, xipope niōkatsopare. Ereēpiko. Ikiniōtika atāonoka hīkamako. Xesosi sākire iaōka hīkamako. Hīkamariko nisāpiretakiti iaōka. Hīxinikakiti ātinoka itxauako. Kona hītxitakakapeua. Ininiākara Teoso katiraōkiri, kauāireri, auapikako hītekata.

<sup>12</sup> Haōkitakakasaakia, hīpoxokoniritika hāpakapakakauako, kotxi Apiananiri nakitiakori hītxaua. Ikinimane Teoso nakitiakori uai auakani xinikamanapitai hīte.

<sup>13</sup> Apiananiri Xesosi Kristo sikari ikinipoko erekari hītemoni. Teoso iteene tiretai. Erekari Matamatakoti moianatai hīte hīkinika. Ameē.

**Teoso sãkire ameneri**  
**New Testament in Apurinã (BR:apu:Apurinã)**

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

**Copyright Information**

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Apurinã

**© 2004, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---



